

槐野先生存笱稿

槐野先生存笥稿卷之十二

左輔王維禎著 館甥渭上南師仲編

行狀五首

贈禮部尚書謚文簡西玄先生行狀

昭勇將軍陝西都司指揮僉事葵軒張公行狀

亞中大夫長蘆都轉運鹽使司運使渭川東公

行狀

封宜人劉母甘氏行狀

太孺人馮母行狀

行狀

贈禮部尚書謚文簡西玄先生行狀

西玄先生者綏德州人也姓馬氏諱汝驥字仲房其先山西臨縣人有諱仲謙者宋季兵亂避地綏德因籍故馬氏遂爲綏德人五世而至秉吉秉吉生震震生永盛永盛爲壽官壽官生驄驄號煙山公馬氏自煙山公始讀書爲儒而煙山公數竒積學竟不第以歲貢爲夏縣訓導陞萬全教諭教諭生四子長汝駿配党氏出次卽先生次汝驥次汝驥皆側室王氏出教諭後以先生貴贈中憲大夫通政司左通政党王俱贈恭人先生之生也爲弘治癸丑九月十九日煙

山公在夏縣學其父夢月墮解宇中取而抱之懷覺異之以爲子得必顯後煙山公自萬金弃官攜先生歸綏德先生尚幼乃卽善舉子業讀書一見輒誦而又卽知聲律吟咏之學試于有司有司異之稱馬生以爲年少而竒非常人也乃正德庚午舉鄉試丁丑舉進士已選庶吉士尋授編修彌爲才子能詩然先生爲人沈毅有大節已卯中 武皇帝且南狩諫者輒獲學後縮莫敢諫者先生曰卽畏臯寧不爲 宗廟朝廷所乎乃奮氣抗疏率諸同館士六七輩赴闕上之疏出先生手切直言巡游有隱憂伏旤不可

天子怒罰跪 闕下五日已又杖之諸上書者悉調
外而先生調澤州知州澤故多王府王率聽用邪小
暴侵民利澤人苦之而未能有禁也乃因事稍懲其
左右不法數人爲條告誠暴止又王以書來請私好
答使者去已卽投書櫝中封之所請或于法得醜又
使將謝乃首使者至櫝前啟取書還之實未發爲報
曰法誠如是吾安敢低昂徇情乎後書不更來陵川
令葛者賄人也害人人怨之庶得狀議且黜令有巡
按御史者以親故爲葛解甚力不聽竟致于法威嚴
震于部中辛巳 今天子卽位錄前諫者忠 詔知

州還爲編修如故澤人攀泣而送之以百千數而前
王以禁不得暴及投書不發者亦郊祖頌德焉曰馬
先生民之父母國之正人也其年 天子用吏請旌
忠加俸一級名由此益顯癸未會試爲同考官以觀
卜才氣取士士多類已乙酉 武宗實錄成有纂修
勞陞修撰明年母王卒歸三年煙山公亦卒先生連
哭其父母至嘔血毀形制起陞南京國子監司業尋
改北監司業會 天子幸大學充講官坐講言辯而
正 賜文綺而司業壓于祭酒不得有所規畫然諸
生固知憚馬先生先生持重有儀度居數歲陞南京

通政司右通政又三歲爲南京國子監祭酒於是先生慨然曰自予爲司業固嘗念諸生善逸繩之今與諸生約度所能行耳期勿犯犯必罰如縣格不解其所約有懲跣跑勤考課稽德行肅威儀數事 今制大學生出散諸曹歷事出序視入不得越而捷者或因貴關說求越疾出卒不聽卽序及故抑奪之曰以懲求者蓋自是大學之教彬彬循循多可觀云虞子禮部右侍郎缺陞祭酒右侍郎當是時少傅袁州嚴公爲宗伯宮詹松江孫公爲左侍郎而 上興禮樂創制度諸大典更起不絕諸公曰聚講議而先生洽

覽群集習識今昔故遇可言則問答如嚮平居視之
顧恂恂若不能者嚴公賢之又嘗善其詩愛重踰等
居久之嚴公拜相見 上言馬侍郎賢 上由是知
侍郎因其官加翰林侍講學士寵之而先生故病
肺爲詩晚節愈益工自始仕至今未嘗一日廢書不
觀皆勞弊心神由是復病會又哭其內子鬱鬱惻惻
不能平遂卒癸卯十一月六日也年五十一歲 上
聞劄下內閣問故嚴公具悉而對 上悼之爲遣官
致祭護櫬歸 勅有司營墓加贈尚書以其德履謚
曰文簡蔭孤逢乾爲官生皆殊渥也今不死得乘會

欵起佐

明主濟昌時其功業可勝道哉公故嘗論

政有三要五術六微七疵八難說甚具竟不及施死
矣公性蕪不好居積所得俸祿悉以給昆弟親戚困
無依者弟汝驪死厚恤其孤而汝驪亦藉以立有甥
十餘人數來乞分公應之不爲怠卒之日御史楊子
本深以其女聘逢乾郎中南子逢吉檢討王生維楨
皆以鄉故咸會哭其室已共發笥視之無有也翌日
嚴公來弔知之爲賻治棺殮而今右相南郡張公者
以繼嚴公爲宗伯與文簡爲寮又來賻而孫公又時
時卽其館撫孤逢乾而憐之若已子云公初娶郡人

劉英女以弘治壬子正月十三日生嘉靖己丑三月十九日卒年三十八歲有婦德事載墓志中贈恭人
生一子四女咸夫繼娶劉氏故霸州知州中部劉君
璋女封恭人恭人天性樸儉衣不御綺日食一菜脫
粟之飯寔助公廉又慈家人有生得野雀獻者亟命
放之先公五月卒寔七月二日也距其生正德癸酉
八月十七日年三十一歲有女一幼側室張生一子
卽逢乾卒十年所矣公室遂無人卒時獨二孤哭其
帷而弟汝驥及汝驊子會亦至哭之曰汝駿者公之
長兄也今汾西知縣前廣德州判官廣德上計來京

期視公疾比至亡哭之會遷官以其觀歸見嚴公受
誠撫孤今年夏以子大學生一乾自汾西抵書維楨
曰瑩擴且就卜以今年五月二十一日納文簡與其
配二氏合而碑志非得當世尊顯者之撰則莫以信
示來世予將哀乞焉子業諾爲狀有乎楨于文簡公
爲館局晚進又甚不肖而公顧謂我爲小友也接遇
至勤行能緒論私竊寔多乃遂與紀次其事公所著
詩文若干卷公且卒之十日自榻前屬楨舉手曰幸
爲我校此集收之令無散滅亡也予歷官多間曹建
立少最致心力獨此耳公談詩常依深嚴忌漫緩淺

俗今校集乃自作固如此校定且謀之梓擬稱曰西
玄先生集而未能也先生號西玄今刻西玄詩行世
者集中十一耳

昭勇將軍陝西都司指揮僉事葵軒張公行狀
嘉靖辛丑八月一日昭勇將軍葵軒張公有子曰安
世者以應襲中陝西辛卯省試安世有同年友曰華
州王生屬謁告在里安世以書抵告泣謂余曰先將
軍已矣然有大勲德焉不列諸窳石莫以托弗朽茲
將走使洛陽請吾師鳳泉先生銘知余者子也知余
斯知余父矣幸爲狀毋辭於是王生掇次來疏按事

而操筆焉狀曰公諱鵬霄字圖南葵軒其號也上世直隸揚州府江都縣人曾大父英自瓜州渡江從高皇帝取天下庚申事定授指揮僉事世襲居六年上忽詔英曰爾隨朕起兵歲久勞多當封之爲侯英辭曰臣年老子孫薄福卽指揮足矣乞勿授 上賢之賜緋袍金帶留侍京朝英傳秤秤初慶陽衛尋改西安後衛奉 高皇帝命平雲南會冒癘疾作 上賜佩刀及家人二戶慰之夫秤者葵軒公之大父也秤有子二人曰煥曰敏 文皇帝興詔煥隨侍煥無嗣敏得蔭其官敏稱長者有器度是爲公父配周氏

以天順癸未閏七月八日生公公脩軀通臂豐頤疎
髯面如紫玉目若朗星正視不見耳聲吐如鍾尤精
騎射壯膂力年十五襲官初將兵守寧夏已改守榆
林已推衛僉書已又陟掌衛事並能舉職効才一時
寮佐咸推伏莫及公由是有名 敬皇帝時北虜擁
衆入寇大將軍武安侯檄公應之公率騎兵二百遇
敵滿受堡公曰衆寡弗當也殊死而已令諸軍下馬
馬盡入堡步戰移日公督擊愈厲忽一虜朱甲青騅
揮刃突來公率壯士許朱三直前斬之朱甲青騅者
蓋酋長云虜懼遁我軍無傷事聞 天子壯之賜白

金彩幣若干是時他將兵孔孛溝者全軍皆沒坐免者衆人以是咸服公勇而公益有名少傅遼菴楊公者 毅皇帝時來總制三邊事徵公募下咨兵畧建圖畫計山川夷險之形暨竒正分合之勢炯炯在目楊覽而竒之大息曰大將才也欲大用不果後環慶地方弗靖有才總制者知公疏公守備環慶陞署都指揮僉事至卽縣賞募兵招商實廩斥堠繕飭城隍峻浚又 奏歲增銀布時犒士卒環人安之寧夏寘鏼亂諸路兵會靈州公謀諸將曰賊據城不出黃河伊邇可引灌使下脫南渡河患不可測矣於是令善

渡者若干人夜奪河船盡使不得南賊聞船奪度不
免乃內自相殺公因攻之約諸將協應賊遂平事聞
天子降勅褒諭賜白金若干兩及紅金帟豹衣二襲
陞都指揮同知公以署職加級辭不受居無何擢掌
陝西都司事都司事故閣相踵莫之或振公憤然曰
不振不立於是刷姦剔蠹者令布條咸斬斬有實軍
吏憎縮無敢犯都司稱治久之蜀中盜起流擾漢沔
湘洛間橫不可撲或有薦都司者而大司馬幸菴彭
公亦檄公督三省十九路兵將討賊公卽督三省十
九路兵將討之渠魁廖麻子喻老人相繼授首俘馘

以萬計公亦親斬六級其時論功第一有王給事者
來紀功諸將謁紀功率旁門入獨公入紀功中道王
銜之乃獨掩公功弗上又分六級三陣同事者皆晉
秩公止得 賜白金及金衣二襲論者憾之又平關
中盜斬獲千二百有奇又平洛南盜洛南盜負山孫
副使難其勳向公念曰此無乃漢南搗兒故事邪公
哂曰未也可二十日擒比捷才十九日孫大服又平
石門山回賊擒其首田迪遂盡收餘黨歸屬冬雪沒
徑馬跌傷足公以是不出居數年今 天子興復起
遂菴公總邊事公以楊雅知我再出董旅期大得志

于時楊壯之歎曰孰謂蕙將軍老尚可用也令代巡
諸邊乃卽疏公掌寧夏都司事不報公曰今之仕宦
者余知之矣不蹊徑率貶折爾予終不能蹊徑貶折
官而愧于志揚公去遂杜門謝事後中丞王公御史
楊公王公連疏薦之竟不出公才氣卓犖屢著勞伐
人謂三錫五等之階超足可至卽公亦自謂非俛俛
人下也乃顧連蹇阨塞不獲大致顯融豈李廣不侯
數信竒邪抑時值嚮吹而公操絃邪嗟哉公之得謝
也日惟課園觀書絕口世故歲時家廟展祭畢坐堂
上令兒孫及家衆羅拜堂下訓以內政甚肅生平不

疾卒日猶三飯如常得年七十有九先公守環時夢一老人皓首龐眉兩手捧紅羅餽公且曰與公約之得八十尺末稍不足人咸謂公壽徵由今觀之信有數邪公慷慨峻爽絕機械論事可否面裁琅琅傾聽好稽古昔說先王興言邃旨超悟自得卽章縫之士猶或後焉余同年渭南有劉子文甫臨潼有任子伯玉二人者曩遊長安與安世交因獲見公爲余道之如此而安世又稱公爲指揮總中軍時有太監劉雲者鎮守陝西肆誅求脇公爲附公面折其非法數事執不從劉怒令無藉毀其宅又僉書都司時能立判

寃訟當道有滯獄皆以委之無弗得其情者此豈非
豪亢自負敏達不局者哉公配胡氏大興尹珣女封
恭人加贈淑人繼白氏清澗大叅行順兄良女皆先
公卒其婦德母儀各載太史康公及總戎揚公兩志
中又繼周氏貴州憲副封君統女子一才卽安世白
出才娶楊氏都督同知宏女繼韓氏叅議邦靖女又
繼焦氏儀賓淇女孫女二長聘胡守備隆子應襲指
揮使靖次聘劉守備紳子應襲指揮同知天敘俱楊
出安世以是年十二月二十一日葬公兆在咸寧縣
光泰里龍首山王生曰人亦有言種木自比種德自

昌余觀葵軒公宣力王事迄老弗倦又讓田于伯仲
二氏用饒可謂篤倫敘理者矣有子如安世當哉夫
長安多文士才卿士生其間者尺寸無譽太微先生
詞壇之鉅師也乃往往稱安世不輟口鳳泉先生擅
聲當代慎與可往校士長安卽首錄安世安世遂有
名塞關中矣安世博學負竒氣不欲以武顯虛蔭幾
念年不襲工辭賦能不作今人語設偶時階用當必
凌跨時曹拓光先葉所謂偉男子哉葵軒公且卒瞪
目視曰吾有兒才後復何慮語曰知子莫若父信然
哉信然哉余謏劣且知公未諳槩爲此論俟命世作

者采焉

亞中大夫長蘆都轉運鹽使司運使渭川東公
行狀

公諱漢字希節別號渭川成化乙未五月二十四日
生嘉靖辛丑十二月二十四日卒得年六十有七歲
卒之一二日呼其子斐屬曰我死卽銘我必王氏子
狀我而可言至再王氏子者翰林檢討王維楨也公
有兄弟凡五人曰周七品散官曰魯兵部車駕郎中
公兄曰郊監察御史曰野刑部主事公弟而車駕公
者王氏子之外舅也故悉東氏之閥諳東氏之履者

皆莫先于王氏子王氏子將辭里之官裴皇皇踏門
求止曰先生去卽誰與狀先大夫乃述先大夫易簣
之言愾愾于楨者如此乃楨竟不得以脂車辭遂爲
之狀狀曰東氏之先蓋鞏昌人有諱良惠者仕元爲
商州總管值紅巾亂城陷死之於公爲高祖事定高
祖之配鄧攜其子驥走居華州不去遂世爲華州人
驥子昇博學有文以貢爲商河縣丞驥公曾祖昇公
祖也昇有子四人舉進士者三人長思忠四川按察
兵備副使次思誠吏部考功員外郎次思恭兵科給
事中而渭川公者按察公第三子也按察公配薛恭

人而生公公生之夕恭人夢樂聲洋洋自空中下導
一綠衣婦盤捧嬰兒降恭人寢所謂恭人曰此與若
子公生而天性孝友靈穎非常年十一按察公卒于
官公扶柩悲號自蜀及家間關數千里不替比長窮
覽墳典刺厲有志嘗曰夫余冠簪之胄而書史之業
也先大夫沒垂空橐以歸乃余兄弟不自圖振興令
延累老母其何顏見先大夫于地下乎弘治癸丑車
駕君謁試禮部公從之至京因受無錫秦公之學無
錫之學主理公既依秦乃遂卽其京之慶壽寺僑寓
卒業嘗夜不就榻晝自炊食惡衣蔬飭意澹性恬若

不自知爲貴家公子如今之藉梁肉縱厭飫者久之
學大益曰吾可歸矣歸遂爲學官弟子有名會遠菴
楊公者校士華州覽公文詫曰何物英俊而究理若
是乃優之首拔置正學書院書院萃三秦之才乃三
秦之才亦靡不推轂東氏矣戊午果中鄉試高等當
是時人謂公進士可一捷而公亦以探囊視進士乃
五試有司竟不合豈非命哉正德辛未渭川公始就
選吏部授直隸池州府同知語人曰吾母老矣竢必
第能養吾懼薤露之先晞也且臯夔稷卨咸焯焯若
是從何第出哉夫人貴自樹立耳至池州會池州造

黃冊同知督造黃冊立法祛弊招亡附籍收九百一十八戶男婦二萬三千二百二十二口大稱增益劇賊劉七起攻陷劫掠流薄江湖吳楚間執如烈熾莫有敢禦同知曰鬪士死戰義夫死守乃點選民兵得壯丁數千人各陣于永豐鎮關壠口鷄籠山等處晝操夜守斷絕賊路賊以是不犯又石埭章仁者起兵謀叛患且不測賴同知計乃止殲渠魁餘黨悉降得無虞又胡天龍者連結王浩八聚衆行劫衝突無方同知分兵于大洪嶺莊嶺赤嶺羊棧嶺並通縣祁等處下令曰賊來直前力戰有後者論死賊凡數十遇

輒敗衄迨三月賊遂平此卽介冑之勇衛霍之畧不能踰矣人常言書生書生豈可謂池州公哉而又有糧長柯瑞者匿金于盒覆葡萄其上稱獻葡萄而中實金公覺之發其事而坐以臯民於是有水清之誑又有程文寶者劫殺人而匿胡三隆所捕者至文寶買捕者顧誣指三隆爲劫縛于官文寶獲賞公察三隆有寃色而文寶卽應口吐實三隆得釋人服其神由是三吳數郡之政咸稱池州而池州之聲益纍纍騰薦牒矣甲戌改鎮江府同知同知治鎮江一如治池鎮江之人戴同知一如池或勒像于石祠之家同

知之政大抵察民隱剔政蠹戢豪右斥姦宄故所至咸戴云丙子陞南京戶部雲南司員外郎庚辰陞本部河南司郎中員外郎故有廉聲寧藩之變部議齎金募兵諸當行者輒辭不往獨員外請行已又返其羨金大司馬喬公聞之歎曰毅哉東員外不可能也乃疏薦之武廟南狩天兵百萬員外以輸餉不乏欽賞白金二十兩綵幣二表裏一時稱焉旣爲郎中奉檄清查江西錢糧得五百萬石宿弊一洗然勞費心神遂以疾乞歸而侍太恭人養于家歸三年而爲嘉靖甲申遂卽其家陞江西九江知府九江三年有

修文廟之功辨海賊之誣毀淫祠以正俗殄渠寇以靖難等事丁亥改南昌南昌視九江倍劇知府優優理之一如無事時有鎮守黎太監者怙執張威誅索無忌獨不能干知府知府見之傲不理遂拂衣出會錦衣使者至意將干知府太監聞之爲錦衣言曰固且止東太守爲人剛直犯之不可屹屹如此歲大飢出粟救餓他郡悉來就食不爲禁曰均吾民也柰何分彼此邪活者數萬人於是巡撫陳公巡按徐公秦公咸薦知府爲九江兵備副使會當塗帑悅不報戊子陞長蘆鹽運使司運使一年釐弊通貨商人戴之

爲勒石頌德庚寅上疏乞致仕侍親畧曰臣母八十有五歲矣而又喪明艱能就養臣日夜思之緣厚藉國恩未忍言去即使母壽及百年計得侍才十五歲耳矧人生驟驥飄風也臣願得歸願 陛下恤臣私上許之歸一年而太恭人卒哀毀骨立卧土草于柩側大冬嚴雪未嘗知避嗟乎孝哉運使歸時諸兄弟獨御史公在御史公有同樂園在城南少華山之隈公亦治圃西溪建四望樓構澹然亭築友華齋鑿愛蓮池景色靈勝並稱兩絕二公者時命車載酒和歌交歡鄉人傳美嗟慕比之二疏二疏者辭榮知止克

享餘齡者也御史病卒運使痛悼於邑竟致疾至此
悲哉配武氏處士義之女封宜人內政整嚴視公克
儷側室趙張又克式武余先配東孺人每往來公家
爲余道之男子三人長蔡大學生娶里人薛尊周女
次卽棊州學廩膳生娶華陰歲貢生楊盡忠女李栗
栗與蔡俱先公卒女子二人一嫁爲知縣王君贊子
謙卒最先一嫁爲隴州河南叅議閻君欽子生員司
繼蔡有四子璠璋珮璣棊有子女各一子珣柯葉繁
茂振振詵詵謂非天之報德人邪壬寅三月二十六
日栗將葬公華麓先塋之次告余期余問棊曰翁昔

何著棊曰有仕優則學稿不自弃稿閒居雜興稿凡
三種又問何教曰書室中大書知命安分寬舒忍耐
八字于壁意蓋自謂而并以訓愚王氏子歎曰東氏
固多聞人廡仕若渭川公并鄭亭公皆稱有道鄭亭
在工部余往往從游今旣沒乃日想見其爲人渭川
公有斐英妙稱竒足紹弓裘振門閥意鄭亭亦當爾
昔余欲狀鄭亭而不獲乃今狀渭川故因狀渭川而
輒思鄭亭不置鄭亭諱實字希大號鄭亭官至工部
郎中給事公之子爲渭川從弟二公者魁梧莊毅而
中復坦蕩而渭川公軀滿七尺偉加鄭亭面如紫玉

坐立如山見者儼然起敬余既次其事而併著其貌
俾世世有述云

封宜人劉母甘氏行狀

西夏人劉君思唐爲山西按察提學副使居無何其
母甘宜人卒于家計至劉君號哭頓地絕復蘊者數
四越明日遂西觸暑候跋太行皇皇望塞行比入關
手容摧毀幾于立骨而華州有王生者劉同年舉者
也聞其至弔焉劉君痛伏地第目睨王生淚淫淫不
收已再拜言曰噫傷哉母噫傷哉母訃母之亡也益
面瘡云瘡八禩安乃一發輒至此唐宦繫弗能逮有

侍也舉其何贖又曰唐奉慈訓乃獲忝從大夫之後
苟沒先德之幽懿不以章顯舉也不滋大哉子尚筆
而聞之以播於是蒐集新故口授王生王生次其事
爲狀狀曰甘宜人者寧夏人也父某處士宜人生而
凝靜機穎不類凡育十歲旣解女紅女紅絕人家人
竟日不聞笑語嚴處士公憐之撫其背曰兒貴徵種
種他日其落誰家年十四歸劉氏質菴公公易其少
或不諳婦職乃宜人顧甚諳事公之父母愈益謹而
公及父母罔不悅宜人質菴公賈維揚家事悉以屬
宜人宜人慎出入戒門扃操并曰躬組織夙夜勤劬

迄無情志戴碩人喜曰有婦如此吾家殆昌乎碩人
蓋宜人姑云碩人常病累三年不愈宜人左右侍時
時供湯藥間嗜欲夜跪籲天請以身代死碩人念之
疾革握宜人手而願其興後於是族黨鄉閭咸嘖嘖
宜人孝子副使君生甫七歲有異質時質菴公賈在
外宜人自爲選師驅之學比長督業愈厲或脫簪珥
市竒書讀少間輒怒之曰汝父悔不學就賈今辛勞
百倍占貲幾何嗟汝固甘勞蹈悔邪副使君怵其言
學遂茂爲弟子員有敵乃辛卯舉鄉試明年壬辰舉
進士又被選爲庶吉士讀書中秘尋改戶部爲主事

拔吏部進員外郎擢今官提學山西不數十年榮名
華品徑攬而超躋謂非宜人之教之功而何邪宜人
雖品流閭閻未諳書史顧識理道灼事機初副使君
在中秘是時宜人來就養每聞中秘士至必訊里氏
聆談對已謂之曰兒交盡海內才宜善結虛吝增所
未有向僻處一隅欲此儕得乎副使君循其言遂有
轍詞林旣副使君爲戶部奉宜人還西夏將之京適
延弗忍行宜人曰第行矣無老身念但汝治性耳語
曰木直防伐不治人將中之蓋君性剛方不屑瓦合
于人乃後爲吏部峻潔自居異已者陰擠之竟出爲

今官而宜人豫見之矣其達如此副使君始有山西
之命私念二親垂白不欲赴乃假道歸省白欲
上表終養意甚懇宜人固止之怒曰以爾草茅寒賤
致身金紫君恩未報萬一豈顧私時邪往哉其勿
我之辭又曰人才難得進退之際不可不慎與其誤
黜寧誤入副使君奉其言往至則標塗對準甄德晉
良崇實左華廸邇刑遠至夫酌進退平賞罰大抵皆
宜人所云居六月風教大行嗟嗟宜人爲古之士女
邦媛者非邪嘉靖庚子五月八日宜人卒卒之日首
孫潛屬曰遺語爾父尚慎展力克官顯宗光孝恨老

身不及見爾嗟嗟傷哉宜人生于成化癸巳八月八日迄卒春秋六十有八初封安人乃復封宜人時質菴公亦累封奉直大夫員外郎雙白並榮每歲時宴會烏紗繡服翟翹霞帔爛爾相輝夏人傳羨嗟慕同爲累德訓子者勸焉子一卽副使君娶郭氏義官德女同宜人封孫三長潛讀父書侍宜人終娶周氏指揮佐女次渥次渤俱幼渤聘陶氏總兵希臯女孫女一許聘都指揮保周子某宜人性嚴整子婦至成立有過恒面斥不貸諸孫皆由撫視雅嗜儉素雖貴猶服澣濯之衣至賙貧卹孤則油油如也人皆謂養福

種德殆渝百年而今已已哉副使君之西也將以某年月日葬宜人墓在城南長湖祖塋之次王生曰余狀宜人劉母事未嘗不辟席三歎而致仰云他無論已卽篤事病姑三霜不渝足稱至德齒榮並茂按察旣昌天之報錫赫哉按察賢豪天與振之啟之又孰非宜人者後祿未量光先名世彼處士公者非常瞳矣不聞以播孰悉其懿遂筆之如右

太孺人馮母行狀

太孺人姓陳氏贈監察御史南溟馮公之配今大理少卿天馭之母也馮與陳皆蘄州著姓皆用文學世

其家南溟公父曰雷厓翁兗州府推官孺人父曰鳳
麓翁福建都轉運使兩翁始爲諸生時並有名提衡
而立相得甚歡是時孺人方幼卽聰慧百解鳳麓翁
稱曰吾女不與凡兒類必不昏凡子而南溟公且亦
露頭角浸浸乎向文學稱少俊矣雷厓翁亦曰吾子
必不令配凡女頃之鳳麓翁過雷厓翁所見南溟公
奇之輒試之則大喜相謂曰君郎殊非凡兒願以女
昏而雷厓翁亦雅聞陳氏女善欲爲兒配未能也遂
許諾尋納禽焉而孺人來歸于馮是年弘治戊午也
於是馮氏子陳氏女皆自以名家子相當且本擇對

相與協和甚篤也南溟公旣壯有大志恒以爲人生而幸爲男子當勉自堅植柰何憑依蹈藉甘兒女子同也卽父官兗州外家運使一如無有孺人自寧外家歸亦絕不道外家富貴事於是南溟公得堅決績學一時流輩咸出其下楚中號曰蘄下生蘄下生自視一第可摘取卽他人觀者亦以爲蘄下生非池中物也乃試有司十往十返卒不售且老乃時時歎憤欲罷業弃儒孺人因問問曰君嘗言揚雄坎壈梁鴻不遇君自謂孰與二氏才南溟公曰此古賢者我安能如之孺人曰誠弗如彼二氏者卒俱困又何啻焉

也至憤憤如此且東鄰之子未齟而宇西鄰之子老而垂髻亦各信所命也而君欲罷業則業之尤矣其柰命何南溟公是之意乃解及嘉靖戊子南溟公竟應貢入南京國子學孺人從是年子大理君舉于鄉南溟公既卒業攜孺人歸而雷厓翁卒南溟公坐侍雷厓翁病被病亦卒孺人哀欲死有媪勸曰媪無甚哀長子天馭未第可視其第季子天駿未立可視其立苟令二子如願足以慰死者何徒嗚嗚摧崩效窮窘無歸者爲孺人感其言收泣理殯卜葬其年庚寅歲也至乙未大理君果中進士第季子亦爲邑諸生

孺人泣謂李子曰令而父在者快足矣居無何進士
除爲評事已又改御史明年御史奉 詔往督南畿
學是時會 天子覃恩孺人得封如今號乃卽函
制詞具法服便道歸斬拜孺人上 制與服爲壽已
奉孺人入南京有頃御史出試士辭孺人孺人誠曰
汝今出行進退權苟安一擲去卽終其身不復錄進
固宜審其尤慎所出乎御史唯唯御史嘗試未半忽
念動輒歸視孺人孺人怪御史何遽以我歸令舛待
試者望自後御史出竟事乃始歸今具中士出其門
旣籍仕版者百餘人頌御史之教勤敏公精以爲凌

跨後先焉孺人之訓成之也居三年孺人思歸斬御
史疏請奉以歸又三年詔起御史復督南畿學
孺人從已御史擢大理寺寺丞孺人以生長南方不
諳北土固不肯與大理俱來大理來則時時念其母
使使問與居者趾相錯于道比進少卿孺人爲書報
曰兒官漸達老身幸益強其母爲吾分公家念也大
理手報喜乃庚戌二月訃至云孺人以正月四日卒
矣大理俄驚仆地左右呼持之乃蘓則大慟曰母乃
謾兒誠強何遽卒也訃者曰元日尚開閤延諸族子
入拜與語越三日偶眩卒實無病大理起爲位哭哭

無休已時於是同年友王生維楨弔之因勸止勿哭
計所爲襄六事者大理遂輟哭坐楨且追述孺人始
末甚詳其大者曰母孺人歸時及事其曾祖母陳祖
母羅兩母咸悅母孺人後兩母且卒咸又稱曰賢哉
婦昌吾家者是婦也母孺人之母也華氏華氏之父
方伯之弟翰林華氏因通孝經小學二義卽用以教
母孺人方馭童時母孺人數數稱二義加訓戒焉言
訖復大哭楨勸之不爲止楨歸居數日大理伏在苦
塊介其門人黃門張君中舍郭君表君三人者來爲
詞曰馮孺人行實大理公業嘗口列始末在君耳矣

願君條爲狀將請當世顯名貴重者銘楨以爲狀者
象也苟得象言一而足乃掇其槩而近象者著于篇
竢名家采焉孺人生成化壬寅五月二日卒之年壽
六十有九歲生二子三女長子娶張氏季子娶馬氏
今爲大學生女一存者嫁爲生員張儒妻其二早亡
凡此法皆得書附于後

存笥稿

卷十二

廿三

槐野先生存笥稿卷之十二

槐野先生存笥稿卷之十三

左輔王維楨著 館甥渭上南師仲編

策五首

聖壽策

王霸策

上書策

相業策

士節策

策

問自古聖人其履帝位而永天年者皆莫若堯

舜其前莫若黃帝顧吾求黃帝堯舜之所以壽者而不得得三墳二典而讀之其所記則皆三聖人敬天卹民之道未嘗言壽豈敬天卹民之道卽所以爲壽而壽之道又復有其說乎已而讀故記乃有述黃帝之所以壽者其要在守一而處和而堯舜之相與問對亦復有天德出寧之說焉由是言之則三聖人之所以壽者誠復有其指矣毋其道玄妙精微貫通無二而人莫之測乎諸生其爲我解焉今日在廷諸臣皆以我皇上之壽不獨兼總三聖而直至萬年益

謂其道同其德超也。今我皇上所以敬天卹民之道，凡著之祀典，布之詔令者，業已煌煌燭燭，照在耳目間久矣。可得觀焉。唯其聖德之蘊，則高遠如天，深默如淵。卽在廷諸臣，未之能窺。而况蒿蓬之士乎？然吾竊以爲測天者，以景測淵者，以意且固。有中之者，今爾諸生莊誦我皇上敬一之箴，非一日矣。能窺敬一箴之指，則知黃帝之所謂一，若和堯舜之所謂寧矣。知一若和與所謂寧，則豈不可以窺聖德之萬一邪？在昔華封之野人，眇小耳尚猶致祝堯之詞。周公

大聖人也思以顯揚其主君之德則數數稱焉
諸生其故陳之吾將敬聽之

聖人之道天道也天不息聖人之道亦不息夫不息者氣之所以達也聖人之德天德也天無心聖人之德亦無心夫無心者神之所以定也神定則固氣達則暢暢則順順則利利則無所不治五內皆融六府皆和矣固則靜靜則虛虛則無所不照萬化自歸萬物自正矣夫皆融皆和自歸自正夫是之謂弗擾弗擾之謂弗勞弗勞之謂得一夫一也者天以是清地以是寧聖人以是治天下天地悠久聖人亦悠久天

地無疆聖人亦無疆夫是之謂與造物爲徒與造物爲徒則亦與造物爲壽天地一聖人聖人一天地未有兩焉者也亦其理固若是也然不知者衆彼不知者難以語道又可以語壽邪愚嘗求之千萬世之前而有聖人之壽者焉則黃帝堯舜其盛矣求之千萬世之後而有聖人之壽者焉則我 皇上其盛矣究所由則皆法天之不息以爲道體天之無心以爲德其爲道爲德又皆不越乎敬天卹民之間而其効則歸之氣達而神定愚請爲執事言之夫三墳者記黃帝之行政也其述相時其述聚財其述崇教其述制

義何者非卹民之事則亦何者非敬天之實軼軼轄
轄亦大煩勞矣然而彌爲垂衣之治者何也爲而不
有順而不宰因天地之紀遂萬物之情故耳故黃帝
之氣恒達神恒定在位百年得壽一百十有一歲也
堯典者記帝堯之行政也觀其制曆象以授時恣四
岳以効能舉元凱以裨政竄饗饗以蠲害何者非卹
民之事則亦何者非敬天之實軼軼轄轄亦大煩勞
矣然而彌爲垂衣之治者何也爲而不有順而不宰
因天地之紀遂萬物之情故耳故堯之氣恒達神恒
定在位九十八年得壽一百十有七歲也舜典者記

帝舜之行政也舜所爲以璣衡齊政以四門通明以
伐苗見威以阜財布德何者非恤民之事則亦何者
非敬天之實鞶鞶鞶鞶亦大煩勞矣然而號爲垂衣
之治者何也爲而不有順而不宰因天地之紀遂萬
物之情故耳故舜之氣恒達神恒定在位六十一年
得壽一百十有一歲也由此言之則黃帝堯舜之所
以爲壽者唯在于氣達而神定然氣之所以達神之
所以定者又在于爲而不有順而不宰焉蓋所以致
天下之治者此術也所以延悠久之筭者亦此術也
唯當蓄帝之時有聖人者出焉告之曰守其一處其

和黃帝拜之而遂服之焉舜嘗告堯曰余天德而出
寧惟堯亦以爲然用之矣然以愚觀之則夫一也和
也寧也此三言者其指雖殊然其道卽爲而不有順
而不宰之說也何以解焉蓋一也者言乎其心也圓
徹霸覺上與太虛其竅流通渾爲一體斯之謂一也
和也者言乎其德也靜與天合不失吾本動與人合
不失吾常斯之謂和也寧也者言乎其志也靜也固
靜動也亦靜無靜無動無終無始斯之謂寧也一者
不擾則萬化自順和者不滯則衆物皆軌寧者不撻
則百昌咸遂故曰一也和也寧也此三言者卽爲而

不有順而不宰之說也故人之爲言也言天而天言地而地貌不相通聖人之爲言也言天則兼地言地則兼天一貫之道也不可不察也於戲黃帝堯舜去遠矣愚所論者特求之嚴跡文字之遺而因推其精神心術之奧未能身睹之也今愚幸而身睹 聖天子之行政矣又身睹其壽矣其行政一皆法天之不息以爲道體天之無心以爲德其爲道爲德亦皆不越乎敬天卹民之間而其効則歸之氣達而神定愚敬爲執事陳之我 皇上之敬天也則郊丘有祀宮殿有祀有祈穀之典有祈福之典有脩省之典有報

謝之典凡可以敬天者靡弗舉也其卹民也則養老
有詔蠲租有詔有傷疫之令有憫水之令有賑饑之
令有勸農之令凡可以卹民者靡弗舉也其敦天之
典也則明大倫制大饗篤事親之孝焉舉嚴父之禮
焉其勅天之罰也則斥不肖戮不忠胡騎來侵則驅
之島夷有犯則擊之身處宮廷宥密之中而慮周乎
四海九州之遠天下有不可勝窮之務而咸取報于
一日二日之間自恒情觀之是其務至繁而其應至
勞也而我 皇上執簡以御繁則繁者自爲順也主
靜以制動則動者自爲理也緝緝熙熙會道之微焉

穆穆玄玄履道之原焉譬之若天焉陰陽之流行四
時之轉移萬物之化生輪輪駘駘而未始有息也然
而於穆之神流者自流不與之俱流移者自移不與
之俱移化者自化不與之俱化而所謂太乙者未嘗
離次也是故以氣則恒達焉以神則恒定焉以壽則
長久而不知所極焉然而在廷諸臣皆以我 皇上
之壽不獨兼總三聖而直至萬年者則固有卜焉蓋
黃帝之所爲壽者一若和而已堯舜之所爲壽者寧
而已各殊其德而不能相兼也愚嘗竊讀我 皇上
敬一之箴矣其曰勿參以三勿貳以一與黃帝和一

之指同其曰靜虛無欲日新不已與堯舜出寧之指
同夫彼三聖人者人抱一德且得年甚永今我皇
上蓋兼三聖人之德而統會之矣愚聞道什于人者
壽什于人德百于人者壽百于人唯我皇上道什
于軒轅而德百于唐虞諸臣所謂有萬年之筭者用
是道卜之也雖然天無心生聖人有心天無爲托聖
人有爲故聖人之生也必受之異焉必厚之周焉必
助之至焉聖人之壽殆天乎何說乎受之異也夫人
生等氣耳唯聖人靜之若山動之若川上知千歲下
知千歲也故曰壽者受也謂受之異也何說乎厚之

周也其所居鉤陳衛座虎豹守關天降甘露以悅其志地產嘉禾以昭其德故曰壽者厚也謂厚之周也何說乎助之至也忽不意老人獻雉羨焉山人呼萬歲焉未有所作鬼神將告之一有所思鬼神將啟之故曰壽者助也謂助之至也由此言之我 皇上之壽非天而何哉愚也生在蒿蓬之野而游乎甸服之中觀聖人之治而不究其道被聖人之化而不測其德頌聖人之壽而不知其要領之所在唯執事教焉

問王霸之辨久矣而竟不得其的論且若管仲晏子皆古之所稱賢臣名大夫也其功業具在

孔子蓋溢口稱之最甚而孟子少之以爲是耻
小耳不足爲我願夫孔孟之一言萬世褒刺之
赤幟也乃顧枝梧相絕如此則王霸之是非何
時而定乎漢司馬遷論撰二子之功則又深文
管仲爲其旣已得君用之不盡其才蓋猶襲孟
子之說也及論晏子顧復甘意執鞭慕之矣夫
此二子者在孔子皆以爲多在孟子皆以爲少
而馬遷之論又若左管而右晏焉若是乎紛紛
不一話也吾甚惑焉竊嘗意孟子之所爲卑二
子者寧有他哉第繩之以伊呂則二子覺么麼

耳假令二子遭商周之主而責之以伊呂之業
則二子者能乎亦卒之不能也又孰爲能孰爲
不能也夫晏嬰雖賢恐難與仲堦伊呂之業誠
偉仲所爲相齊之政亦往往相似而卒不免孟
子之譏其隱居何所哉諸生其深究焉吾將以
是而決王霸之分觀辨志之學矣乃若撥拾陳
唾褒抑無當則非吾所願聞也

君子欲立事功于天下者有其志矣而猶欲勿徇也
有其識矣而猶欲勿權也何哉夫王者聯四海之外
以爲家而霸者服列國以爲長其大小不同也王者

之澤百世未泯霸者生而赫赫沒則已焉其久近不同也豈以管仲之識而不辨此哉方其拜上大夫之爵而尊以仲父之號也彼亦欲駕鴻鵠之翼而致桓公于湯武之列其待主君非小其所欲稅駕之地非在睫間與几下也然竟不能如其願者疆國環視而主君急功也主君急功則不能不徇疆國環視則不得不權徇主以遂名權謀以服衆此功之止于霸也非其志不遠也有所徇也非其識不足也有所權也竊嘗讀管子治齊之政而因有以觀其識與志焉何觀乎井牧畫田與王者之制產同什伍連家與王者

之制兵同設輕重之法與王者之制幣同捕魚之法
煮鹽之法與王者之厚生同妾無美食以贍貧窮臣
無羨祿以撫鰥寡與王者之不霄無告同不以飲食
之辟害人之財不以宮室之侈勞人之力與王者之
節用愛人同與俗同好惡與王者之懷保同令卑而
易行與王者之近民同夫其政如此而謂管仲不辨
王霸之義不可也而謂管仲無志于王者之道亦不
可也然卒止于霸者則桓公之志然耳何也夫王者
之政一世而習再世而化三世而恩結名立恩結名
立則人愛之若父母從之若流水得非有之地撫非

有之民雖有溟渤之遠江淮之巨不能絕矣雖有華山之高會稽之險不能障矣雖有資育之勇孫吳之兵不能當矣其功誠偉非一世之効也其名誠高非一朝之積也彼桓公者將及其身顯功名于天下安能於邑待累世之勲而俟後不可知之譽乎觀其再會葵丘則固有振矜之色矣居無幾何又欲封泰山禪梁父自序于三代之後焉此其器易盈其志易驕信必然之畫而不能忍歲月之効名爲任仲而實欲仲之任已也名爲扶義而卒欲并利歸也仲視桓公猶之漁者之視鈎也魚有大小則餌有宜適桓公有

志則安得不徇乎於是選主之好選主之惡蓋主之
愆揚主之美爲主富國則實倉窳足衣食爲主彊兵
則作內政連五家國旣富矣兵旣彊矣於是伐邾邾
子奔莒已而伐魯魯侯來會于柯已而會諸侯于甄
已而會諸侯于葵丘至葵丘之會則威名大著赫赫
燁燁燭照海內而桓公之霸成矣始末霸時桓公初
立而楚魏秦晉之國最彊非彼噬我則我噬彼軍候
適人交至而不絕相親相惡錯見而無相歡來則如
嬰童之連臂踏歌不知其日之移也怒至則如齊之
勇夫袖刀相啖盡染而後止焉夫所值之時旣如此

而所事之主又如彼此仲所爲甘心就霸名謝伊呂而功羞湯武也然其霸也不殘不賊不倨不亢不爲不仁不爲不義端在興滅繼絕除害平戎之間入重耳于故國徙衛君子新丘申尊周之盟却燕君之送凡此數事悉皆合于王者之法孔子所以稱之不容口乃曰如其仁如其仁者有取于此耳語其功也孟子所以卑管仲而罪其負君者諫其志也而不究桓公之志焉此說立而後世因之至漢司馬遷遂勸其指以責仲而不肯相寬乃知豪桀之立事非得君不可以遂欲非守固不能以善圖甚矣哉不可不慎也

若彼晏子之事景公也承桓公百歲之餘烈而管仲相齊之政其令甲法度尚遵而勿失故景公復疆諸侯賓貢不絕此非晏子能致主于霸也管仲之遺教然也司馬遷讀晏子春秋覩其服敝裘乘柴車內無衣帛之妾外有脫驂之事其諫主也不憚批鱗不顧罷免以爲此賢者之所難遂欣慕之思爲執鞭而苛責管仲焉此所謂尺短寸長者也夫晏子之所難管仲之所易也而管仲之所能則晏子之所必不能也何言乎葵丘會時王人來致胙桓公下階拜仲令之拜也桓公之欲封禪也甚厲仲不許遂罷仲何嘗不

強諫哉但未嘗揚君之惡耳若令仲後百年而生得
景公而事焉則景公之過不彰主君日遷于善而不
自知君有美黜而臣無直殺也且令齊國無賊有賊
必討其炳幾先事之防折萌室竇之畧彼晏子者且
不能窺其藩屏而况以登攝堂室乎故曰晏子之所
難管仲之所易也然以晏子枝管仲之任吾知其必
無當矣何也敝裘登壇不足以攝帶劍之客柴車行
野不足以招丹轂之主儉治其躬矣而景公自奢意
嘗自下矣而御者自驕上之不能免國之難下之不
能討國之賊近者若此何以服遠幸矣哉晏子不得

爲管仲不及其桓公霸日而事之假令得爲管仲及桓公霸日而事之必不中其懷仲父之彌移日之燕晏子不得一于彼而射鈎之鱗猶將復之檻車之苦猶將益之鴻鵠之翼猶將鑠之鼎足之美猶將折之故曰管仲之所能晏子之所必不能也嗟乎管仲本乃挾王佐之才而卒止強霸之業本乃負王佐之志而奪于急功之主不能自明人生遭蓬有時功名有命所值之時卽命也伊尹之佐商呂望之佐周皆命也若使夷吾當二代之際而出庸鉅知其不爲伊尹乎不爲呂望乎惟後之君子待伊呂太高視管仲太

卑以爲貌不相及而不究其固有甚相若者存也所謂甚相若者夷吾治齊之政是已二代之政主在仁義齊國之政亦本仁義卽錙銖不爽也所以貌不相及者伊呂主仁義主之者其實也爲安百姓爲保四海而無所私也夷吾托仁義托之者其僞也爲服疆大爲并弱小而志不屬之天下也卽若責夷吾以伊呂之業則夷吾亦復變而爲伊呂之志不移日而可尋其端不移歲而可舉其凡不移世而可底其績矣何也其志固在也而奪之矣還其奪何有乎昔有人學射于羿者而請羿之弓羿曰吾之弓卽子之弓也

明日學射者以其弓來羿教之射令正其志焉射遂精與羿無異也夫射不易弓一正志而執遂精矣若欲轉霸爲王豈變其行事哉亦易其心志耳矣於戲志也者機也王霸之所由分伊呂之所由高管仲之所由卑皆從此發焉甚矣哉豪傑之立事不可不慎也雖然彼鸞鳩不出乎枋榆之間跛驢不涉乎太行之路志豈不足哉力不能也大鵬之南圖赤驥之千里此獨其志遠哉力有餘也并志與力而兼具焉乃能擣九漢而致千里也甚矣哉豪傑之立事不可不強也至其行事之際忽襍以數稍離于王道則君子

濟時之微權聖人之所嘗爲而不語管仲之所善用
而被誚者也誚仲者曰本欲伐蔡乃飾楚之罪本欲
伐山戎乃令燕君脩政本欲貧梁乃貴買梁國之綈
本欲困莒乃重買莒山之薪諸所不足者皆此類也
嗟乎從古以來立功之士豈必盡中繩墨哉拯溺者
濡衣救火者焦額固其理也禹之裸國裸入衣出墨
子游齊吹笙而衣錦此皆變易平生而濟少選之務
者也若盡持繩墨削立功之士則伊尹呂望皆有創
殘被伊以染湯之號加呂以釣文之名則何辭焉故
捐擿微瑕則宗廟之圭瓚恒缺寸朽不錄則大廈無

落成之日矣此又論人者所當知也

問昔漢臣上書于天子有四名一曰章二曰奏
三曰表四曰議夫書一也而取名殊異者義各
安指也漢臣言事莫良于董賈二子賈誼論制
匈奴則可謂之表論遇大臣則可謂之奏乃統
名之書焉夫謂之書者又安取也仲舒陳德刑
之分甚明原災異之故甚辯其陳德刑則可謂
之章其原災異則可謂之議然一名之策一名
之對者何也二子通于諸義以故言出而當世
是之後世傳之言豈可易哉史稱賈之才達董

之學精夫既才且學又達而精乃始言之當也
故今言事者宗董賈宗董賈有術諸士子其嘗
講之不也苟有能言董賈者異日卽克宗董賈
者也

人臣有見于事而不能自聞故書者所以聞事也有
切于意而不能輒通故書者所以通意也意之所措
詞貴別白指貴分明不別白不可謂之章不分明不
可謂之表如此則意且不自達又安以冀人主行其
說也事之所敷可否欲其有度得失欲其有裁無度
則不可以奏無裁則不可以議如此則見在我且未

審又安以冀人主行其說也故書而稱名曰章者取其別也傳稱色有五章蒼素雜丹緇混非章也稱名曰奏者取其度也嚴氏曰樂一更端曰奏作止高下無節非奏也稱名曰表者取其明也猶揭物于杪睹者得識之也稱名曰議者取其裁也排布群言卒而斷以己意決疑定紛聽人主擇也總而名曰書者傳曰書者如也謂寫其言如其意意在千里則言遠意在咫尺則言近賈誼言制匈奴言遇大臣是也又名曰策者人主登士而計可否商得失則爲之辨可否決得失董子論德刑是也又名曰對者人主有問焉

則就所問酬之事無匿避語不滑澤董子論高園廟災是也夫人臣進言于天子必先自定所名曰章曰表曰奏曰議曰書曰策曰對此七名者貴識也未有七名昧而良于言者也然七名之義各有奧樞未有七義昧而良于言者也故賈之書董之策若對斯皆通于七名究乎七義志無沾滯語無乖刺固所謂良于言者也夫賈誼者漢才人也少而達國之體事文帝爲中大夫文帝時匈奴數寇上郡雲中邊臣不能制朝廷不以問誼以爲可流涕乃獻三五之計自請授官屬國願使匈奴繫單于之頸于闕下其言曰匈

奴之衆不過漢一大縣夫匈奴強漢視之以少爲多漢兵弱因自視以衆爲寡自斯言出釋中國憚虜之心張謀臣摧敵之膽猶之揭物于杪睹者皆識之也漢法嚴大臣有罪輒收逮係縲事得白復釋之夫收逮係縲是指棄體貌大臣下比于庶民也釋之而復使在上臨庶民庶民卽不敬大臣矣誼太息焉因取投鼠之譬堂階之譬冠履之譬屢囑數百言凡以明大臣近主尊卽有罪下視庶民當爲異法輒折辱之非宜已又曰上設廉耻禮義以遇其臣而臣不以節行報其上者非人類也始切望于君卒反責于臣語

有節會指有端闕猶善樂者變聲更調傾人聽聞也故曰誼良于言者也董仲舒者漢篤學士也明于天道人事之紀其言辭所回匿武帝棄德教之官而專任執法之吏舒以爲非天意也一日帝策曰伊欲受天之祐享鬼神之靈則何道舒因推天配人謂天有陰陽故人君有德刑陰不可任以成歲故刑不可任以成治然獨陽亦不成故假陰以佐之則歲功畢獨德亦不成故假刑以佐之則王道終斯言也顯示取舍省悟人主若指蒼素若列丹緇絜乎煌煌甚可觀也武帝時高園殿災又遼東高園廟災帝以問仲舒

仲舒見當時親戚貴屬左右之臣驕揚恣睢朝廷不
忍致法乃因托天而比其類以爲罪在外者天災外
罪在內者天災內燔遼東高園廟者天若語可視親
戚貴屬遠在諸侯不正者忍而去之也如吾燔此燔
高園殿者天若語可視左右近習在廷不正者忍而
去之也如吾燔此斯言也直而不阿斷而不惑又當
實切理故曰仲舒良于言者也夫旣良于言矣而人
主不用其說則非二子之能與矣然亦二子之咎也
何也凡人未見福而突言福者聽者必喜未見禍而
突言禍者聽者必怒誼言事方動唇吻指意未具人

主且湯湯聽之乃驟取痛哭流涕太息冠其篇以發
端抵冒夫痛哭流涕太息此數言者皆哀窮悼亡語
也寔觸人主之忌忌則惡惡則遠而長沙之命下矣
不專坐絳灌之徒害之也仲舒言災異著事應以爲
人如此天變象此人如彼天變象彼自理測之也然
造化幽杳變化不可執盛夏而靡艸死嚴寒而欵冬
花安可擬也苟有其事或無其應或事在此應復在
彼人主將不信矣天何嘗不信至今令不信者則事變
之說啟之也仲舒方正武帝敬禮之卒不免江都相
誕視所言以爲不按事實也夫以賈之才董之學而

爲言尚猶錯迂疎缺不當人主之意則言豈可易哉
故言而衝激褊躁犯主之顏以危其身而無立于事
臣不謂良兩設俱可不要于一以眩其聽隳其功臣
不謂斷好爲隱語暗射掩擊未知所指臣不謂亮米
鹽小談遺社稷之大計臣不謂明言古則徵引不合
言今則考訂未融臣不謂達博拾泛及人主觀之未
睹指要臣不謂精此五臣者固進言者之所戒也彼
二子者則進言者之所宗也何以宗之賈宗其志卽
才有弗逮則亦賈之徒也董宗其心卽學有弗逮則
亦董之徒也設有其才無其志則才轉生害有其學

無其心則學乃滋奸若二子者有其才矣不肯養祿
負其志大學之于家畧不肯壞之天子之庭其心
正志大則才不弊心正則學不偏故二子之言名于
當時施及百世也夫人才之生世也在一鄉千而拔
一在一國百而拔一在都會十而拔一選益精則才
益寡若二子者言施百世百世之下莫敢與爭能固
百世之選也百世之士識之者眇故二子並棄于漢
都會之士識之者半故或棄或取一國之士識之者
衆恒以自固其身一鄉之士則世又忽之矣故士大
卑者人忽之六高者人危之若是乎偶世之難也不

令人忽不令人危則中才適好矣夫天生尤才不數
數然而棄之危之者常未休乃顧歎曰乏才乏才夫
才在天下何嘗之棄之危之才者危在下位置在尊
野抑而不獲施也然則君子之愛才與才之所自用
皆不可弗重矣

問自三代以還其號稱王佐之才者無先于諸
葛孔明乃其相蜀之跡率犁然可考有作必異
有言必偉而宋儒或以偏才目之何謂乎漢初
大功臣蕭何第一何事高帝常居帷幄中持文
墨議論未嘗有汗馬之勞也而史臣至稱之爲

一代宗臣何以故始孔明未遇時嘗自比管樂
吾觀孔明之才不謝伊周而顧以管樂自比豈
宋人覩其素許如此而事功又如彼乃遂爲觀
場之見而少之乎且固有說也高帝差品諸將
常取獵事以白蕭何之功當是時何寵冠群臣
轂施海內矣意者史臣望其末光以爲竒絕遂
立號宗臣予之邪若不然者必有說也夫此兩
公者皆漢之所稱賢相名大夫也其事功或就
或不就天也其大體有得有不得則人爾不可
謂之天也自今觀之若畧其事功而直以才校

則何不逮亮遠甚姑舍其才而直以大體校則
何爲得乎亮爲得乎宋人議論好窮本偏才之
駁不屬孟浪班固撰漢書務在核實其予何絕
甚誠有觀其大者諸生其深究之夫論人者譬
之入寶肆評賈直也一不得當市者遂用以爲
低昂可弗慎歟乃若哆口無驗妄施褒抑而輕
搖其筆端卽令竒文蔚起主司者將蔽帚視之
則何貴焉

人君以大臣之能爲能則心逸而功集大臣以天下
之能爲能則事治而名高名高則獲在我事治則勞

在人功集則獲在上心逸則勞在下在昔明君之所
以撫世賢相之所以獲福皆不出此亦其大體固若
此止矣愚蓋嘗讀孔明出師二表焉彼其盡瘁之忠
敵愾之氣卽鷹揚不過也其詞感憤其文瑰壯卽伊
訓不過也又嘗考所作木牛流馬之制焉其巧通靈
其用利捷卽公僦不過也又嘗觀所畫八陣圖焉分
列部署上應天文下合地理卽穰苴不過也孔明竒
才也其諸過人者不可勝數然大率類此矣卽就三
事而論焉則亮之所以望抑群雄名高當世者此也
其奉魚水之歡而不能建一統之業者亦此也何者

大體失也。今夫人君之于天下也，譬之若天焉。宰相者，斗杓也。百官者，四時也。天運則杓轉，杓轉則四時行而杓不化，而爲四時也。譬之于人，若心焉。宰相者，意也。百官者，手足四肢也。意聽于心，手足四肢聽于意，意不化而爲手足四肢也。故天道圜地，道方。君主，圜臣執方。宰相者，立于不圜不方之間，所以斡旋四序，揮使四體者也。若乃孔明所爲出師表者，氣旣鷹揚而文復瑰壯，一出則倣儻之士修詞，之子皆捫心退矣。木牛流馬之制，出則伎匠之徒執斤鍤而求售其巧者，皆擺指退矣。八陣之圖，出則誦鬼谷之書，習

黃石之畧者皆批頰退矣夫使諸技客才人皆退而不敢前引以爲弗如而不肯任則亮不得不勞以故恒自立于矢石之間事無大小悉決于帳前課功程罪不寒毫髮是斗杓化而爲四時意化而爲手足四肢也事必不可集功必不可就才累之也而大體失也所謂大體者我無能而無不能也我不足而無不足也不操鉛槧而天下之文皆吾文也不事剗刷而天下之巧皆吾巧也不學兵法而天下之畧皆吾畧也人君執斯道而任相則爵祿不悖宰相執斯道而柄事則福澤無窮何以說也漢高帝之起豐沛而定

天下也天下豪傑之士雲附景從日以百輩來乃拜
蕭何爲丞相所謂爵祿不悖者也天下既定論功行
賞蕭何功第一先封於是封何爲鄴侯食邑八千戶
位次居諸將之上賜劔履上殿入朝令勿趨已又封
其父母兄弟凡十餘人皆食邑有差此所謂福澤無
窮者也自今考鄴侯之爲相也無竒也以運籌決勝
不如良之智也以戰克攻取不如信之捷也以揮霍
先登不如參之勇也以橫行直下不如噲之敢也其
功爲第一者以無智而使智良則良出其智以無捷
而使捷信則信見其捷以無勇而使勇參則參奮其

勇以無敵而使敵噲則噲施其敢而沛公之帝業成
焉故未嘗挽強而曰射取江東者鄼侯也未嘗馳駿
而曰踴躍中原者鄼侯也何非能踴躍非能射取諸
將之踴躍射取者悉歸之何以何能使之也取亮較
何何木彊人耳出師二表何不能爲木牛流馬何不
能制八陣圖何不能解獨以無文而用文無制而用
制不解而用解遂以佐成大業而享有令名寵冠群
臣而慶流苗裔也由此觀之則班固以一代宗臣予
何者非以何事功謂也謂其忘已任人恢恢乎有大
臣之體也後世有佩何印綬襲何職事者則撫海內

鎮國家無事他求卽此人乃其宗矣宋人目亮爲偏
才者非以事功弗就之謂也謂以抱才自用不屬之
人也後耳目任聰明屑屑瑟瑟殊異乎混一之規模
無內無外之氣象也今天下之事一有未治則責
之相社稷之功一有未集則責之相卽令相事事而
擘畫之人人而譙聒之惛惛然用力益勞而取効益
遠求之彌切而得之彌艱故在用人而用人之道又
在乎有能而不能有餘而不足蕭何之驅使諸將也
似乎無能而能于諸將疑于不足而足于諸將彼孔
明者有竒而直見其竒耳此竒者不爲用也此兩公

之別也竊嘗觀于孔子矣力能舉國門之關而不以力逞懼夫人之有力者不爲我盡也明能見吳門之馬而不以明著懼夫人之有明者不爲我視也博能辨萍實之狀表商羊之異而不以博銜懼夫人之有博者不爲我告也智能決拾塵之誣料結纓之旤而不以智名懼夫人之有智者不爲我察也故其相魯也一月而功集三月而道行不自聖也不自聖乃所以爲聖不自賢乃所以爲賢惜哉亮之不察乎此也夫相臣之於天下也其始而分其任于衆也猶之治絲焉人理一縷人司一染已而付之機上杼柚旣成

則貴人衣之不曰某工之所製也但稱曰某貴人之
衣錦美錦也猶之乘馬焉伯樂相之王良御之造父
驅之貴人乘馬而過于市市人曰貴人之馬良馬也
不問相之御之驅之者誰也其事治功集君上悅之
而獲有福祿也猶之宴賓焉宴賓者酒人奉觴饗人
奉膳鼓瑟吹竽客心甚樂矣明日不拜樂已者而拜
主人主人使之也猶之治宮室焉大匠爲圓必以規
爲方必以矩方圓旣成則規矩無功而主人謝大匠
曰巧工也及宮室旣成邦人相賀不賀大匠而賀主
人主人居之也蕭何有辨于此故竟以帷幄蒙福孔

明不察乎此故迄用瘁斃此兩公之別也雖然自二表傳而逆臣懦子讀之骨竦而毛豎自陣圖立即江水泛濫而行次不失焉自牛馬之制出歷數百歲未有能解其事者此蓋天地之毓靈孕秀鬼神之託精見異乃生此隆中之龍耳非庸衆人也顧愚所爲扼腕者念其齋志而終令萬世有憐才之歎耳抑愚又有說焉從古以來號稱才士者不可勝紀然往往不聞道不聞道則才不成不聞道者何也不學也所謂學者非他也唯在于忘好惡去巧故釋智術除將迎栖志乎無妄之次游意乎自然之塗如是則無以害

其真而知精知精則知神知神之謂知道凡彼群才
得道然後廣故知道則萬物畢聚濶大淵深不可測
也性情嚴扁無所思慕不可誘也塵壒越絕中情潔
白不可汙也霸徹貫通比干著蔡不可欺也動作當
務與時變化不可窮也得失成敗先幾炳見不可遁
也賢人至前邪夫乘之不可溷也毀玉爲珉譽猶爲
荃不可誑也夫唯知道則才乃達才達則無已無人
無內無外無已則無難舍已無人則無難任人無內
則無醜力不已出無外則無惡功從人立此學之成
也孔明講于寧靜之學蓋嘗聞道矣又其治蜀也亦

嘗開誠心布公道集衆思廣忠益矣固非用才自見者也而所就竟若此何也蓋其才焰閃爍如燈之在惟一開一合時見時藏而不可終遏也以故觀者疑之疑生懼懼則衆不爲使而事功隳然則君子之學也非聞道之難而體道之貴蓋自古記之矣

問聖人之教本以拯時行道爲賢而今之君子固有談古高節獨行之士者此不可長也其談古高節獨行之士則率稱引段干木魯仲連之倫焉以爲此二子者可以廉頑而立懦其說似矣乃或有稱鮑焦爰旌目荆輿顏闔之四人者

焉吾不識四人者之蘊與段魯二子何似然其
行皆過激非人情難繼乃亦博萬世之名何也
嗟乎此亦後世好奇之士爲之標幟耳不然則
四人者皆與孔子同時孔子著魯論其述賢入
君子之行衆矣然上不挂髮鮑下不引闔輿豈
聖人之論撰顧於廉頑立懦者而屑越邪亦或
其少之也夫高節獨行士之所甚難能也然而
有聖人爲之軌則焉聖人之出處固不若是之
必矣乃若段魯二子其竒可以扞國家之難望
足以寢疆敵之謀而志在固藏其視聖人之道

何如邪夫持二子以削四子則四子爲小持聖人以削二子則二子又復小矣夫其遞相不及者何在乎然此四子中且亦有區別尚費品題未可以一槩量也諸生其一第其等焉方今聖明御世山澤之儒苟具一德通一伎者咸來上謁而誠願自効益充滿公車矣然吾所慮者俗行無名俗事無功將無有好竒如六子者出乎吾且適古之非以防今之趨耳母曰駢拇而枝贅矣無關世教也

聖人之視天下猶一家也其視天下之人猶一身也

故世有紛難必思批之世有勛勦必思定之猶之有
家者顧家有身者顧身也今夫天久雨墻垣圯以爲
不嚴且有盜汲汲然不俟明日而連築者顧家也病
五日不起未甚也客有言秦越人者知禁方能已人
之疾則裹金馳使而請之顧身也世有紛難勛勦之
事而掉臂不顧高枕不來是視天下不如家視天下
之人不如身也聖人弗爲也是故駕敝車策羸駟軋
軋以行于四方而弗以爲憊也于七十二國而弗遇
乃猶使子貢之徒搥唇鼓舌游揚于諸侯之間偃偃
然冀萬一之聽而弗以爲倦也上嘉唐虞下樂二周

如有用我者執此以往而弗以爲夸也及得定公而相焉則卽墮三都去正卯而弗以爲橫也旣用弗卒則卽退栖于杏壇之上與七十子之徒講道而論治焉以立百王之準而弗以爲高也用則往不用則引而退又復用又復往又復不用又復引而退聖人不厭其煩者凡以爲天下也思欲批紛難定動勦伸磨虞之志而樂行二周之道也方今海內爲一旣異于春秋之世而 聖明在御天下抱竒之士畢集于廷林藪窟宅皆虛而無人何者用之也令孔子生而當斯世則亦且車馬不疲杏壇無講矣何者遇之也而

世之君子顧乃有稱鮑焦爰旌目荆輿顏闔段干木
魯仲連之倫者以爲此六子者皆能遁世好隱不沒
于利不牽于勢此高節之士獨行之賢也欣慕之焉
嗟乎此猶之厭梁肉而思藜藿謝淄澠之水而甘行
潦也悖之甚矣夫學也者學爲聖人耳聖人出處進
退之跡固在世所謂無意無必無固無我者也而今
之君子離聖而語行違道而談節出者皆卑則釋以
六子處者皆高則附于六子若而人者卽非幻民亦
屬狂子愚不得不辯故愚嘗謂隱有四術而君子察
焉有炯然抱竒而固請不見其名曰石隱欲觀我竒

而令我見才一見之而輒復收之其名曰高隱度無
所見而託獮以覆短其名曰智隱空自以身爲枯木
朽株而尺寸無間其名曰痴隱此四術者君子不可
弗察也夫所謂石隱者則段干木其人是已所謂高
隱者則魯仲連其人是已所謂智隱者則荆與顏闔
其人是已所謂痴隱者則鮑焦爰旌目其人是已夫
鮑焦者吾不知其何許人也第聞其衣敝衣持蔬而
遇子貢于道也子貢曰吁吾子苦矣衣敝而蔬之持
也鮑焦以言擢子貢子貢亦以言擢鮑焦焦愧而立
槁于洛水之上焉爰旌目者東方之士也餓于道有

狐父之盜曰丘者見而下壺餐以饋之已而知其爲
狐父之盜也乃吐之而兩手據地喀喀而不出竟伏
地而不起也夫此二子者皆古之所謂高節獨行之
士也亦徒聞其能不辱耳而史不著其他竒貨可張
設施行也夫其不辱也固昔人之所謂枯木朽株耳
不亦愚乎若彼鮑子憤世不用蓋與世猶未絕也乃
不能忍痛須時而輕投其身于空虛無用之地此侍
人婢子之所爲一不得意輒効于榻前以爲無復之
耳昔卞生三刖其足矣乃懷璞呱呱而不去彼亦謂
須識者耳卞生不肯亡璞竟剖見珍且乃獲賞鮑子

不聞斯道而徒以憤斃故曰痴隱聖人所不道君子所不由也荆輿者荆人也楚王使使者齎百金造門曰請先生治河南荆輿不許也遂負釜戴經而與其妻去莫知所之顏闔者魯人也魯君將造闔使人以幣先焉使者及門而見闔闔給使者去使者復來闔鑿坏而遁矣夫君子之所爲重進者蓋謂其無禮耳今楚旣齎金魯亦攝幣可謂有禮矣乃荆輿滅影顏闔竄跡此之不往則又何須也昔宋人有寶燕石以爲王者襲以十巾藏以革匱人不得觀焉旣發藏則乃燕石也觀者俛首掩口而笑焉則此二子者乃亦

寶燕石而懼其發藏以賈笑也乃固祕之耳嗟乎兔
絲燕麥徒有其名踴鼎烹雞豈其任乎故引而逃去
而且博捐金輕幣之譽以遺後世又有高節獨行之
風故曰智隱聖人所不道君子所不由也夫旣聖人
不肯道君子不可由矣而後世轉稱之何也以其賢
于貪生而優于競進也於戲吾竊痛後世之爲士者
焉較利害于毫毛之微而爭功名于尺寸之間託名
千金坐不垂堂何其怯也已觸三面乞以一目見脫
何其哀也積澤之火不揀而麗水之金顧採何其智
也食嗟來之食何其苟也伏在車下泣血孫陽何其

卑也突梯滑稽以叨升斗何其汙也貶抑孟賈自前
進御何其妬也日置驛馬請謝賓客唯恐不徧何其
周也得近霸王不羞牛口又何辱也四至九卿甘宦
若飴又何巧也身處江湖心縣魏闕又何鄙也慎不
得意坐而書空又何隘也若此類者不能舍生不能
遺榮令與立枯吐哺之輩負甌鑿坏之倫同日而並
論則高下相絕奚啻萬里無怪乎後世之有迹也然
以聖人處之則不若是然耳自聖人而降則唯段干
木魯仲連之二千者其庶幾焉夫秦將將四十萬之
衆而東圍邯鄲也趙危若累碁存亡在俛仰之頃矣

趙且欲尊秦爲帝以免難也仲連固不肯而語中有
竒數數乎有動衆傾秦之術秦將聞之爲引軍去趙
得不亡者仲連之力也趙欲封仲連仲連辭不受壽
之金亦辭遂去而逃之海上終身不見也夫却秦存
趙不亦偉乎避爵辭金不亦潔乎故曰仲連高隱言
善見又善藏也魏在春秋爲小國秦視滅魏若搏豚
鼠耳然竟文侯之身不敢加兵于魏者則段干木在
焉文侯嘗欲相干木矣干木不肯也乃日造館而請
事焉秦將攻魏諫者曰夫魏不可攻也段干木賢者
也而魏禮之尚可以加兵乎秦遂輟兵不行夫不就

祿位非潔乎跌坐高談令所居之邦不危非才乎故
曰干木石隱言堅不可移也世之君子賢干木而右
仲連者獨稱其讓封避相以爲高節獨行之士也而
不知二子之所以爲賢者不獨在讓封避相在却敵
免難耳不費一領甲不食一斗粟而置兩國于磐石
之上敵人虎視狼顧而莫敢誰何此其人豈徒沁沁
泯泯居無一物者邪故卽不出卽榮華卽不隱隱
卽冥冥譬之若神龍然能潛能見能上能下不可以
形跡拘不可以網羅求也然此唯仲連能當之耳若
彼干木者塊處石室彈琴樂道以咏先王之風而不

顧人世有拯溺之事其於聖人之出處何乎然能抑
秦王之虎心不可及也仲連一試而遁秦雖釋趙釐
必中于他若使仲連拜趙之封而以所壽之千金爲
資養賓客以親秦約與國而申誓歡樂則相賀患難
則相援亦庶幾哉與桓文之霸業比隆矣而卒乃逃
去爲德不博弃百代之烈而薄收須臾之譽非聖人
之槩也然能以三寸之舌折強秦四十萬之衆不可
及也由此觀之則論士者必投之猝至之難以觀其
才焉才旣明矣又試之非意之榮以觀其操焉操旣
得矣又納之死生之地以觀其志焉才足以批難矣

操足以遺榮矣志足以忘軀矣備斯數道而甘就閒
寂終身枯槁乃稱曰高隱也三者缺一焉猶屬之智
隱也夫智隱非傑也痴隱非情也石隱非道也高隱
非聖也彼六子者皆非也卽有慕其殼而趨之者又
以非蹈非也於乎君臣之義其在天地之間也猶之
逃雨焉無之而非是履其土而欲潔其躬非也竊其
名而佯棄其名非也謂隱獨高非也謂出獨卑非也
謂世莫我知非之又非者也夫入也以身盛心以心
盛智一人一心一心一智故一人不能當十人之視
而視者不止十人一心不能當十心之疑而疑者不

止十人彼六子者千百世以前人也千百世之下且
猶揭肺腑而定藏否也矧當其時乎語曰楚璧稱璞
腐鼠亦稱璞月旦稱朔車軸亦稱朔名實相溷往往
有之然而卒有能辨之者甚矣哉君子之出處不可
不審也

槐野先生存笥稿卷之十三